



GPJ/MLW

6 Ionawr 2009

Stefan Sanchez  
Clerc Pwyllgor  
Gwasanaeth Seneddol y Cynulliad  
Cynulliad Cenedlaethol Cymru  
Bae Caerdydd  
CAERDYDD  
CF99 1NA

Annwyl Stefan Sanchez,

**YMCHWILIAD Y PWYLLGOR I HYRWYDDO CELFYDDYDAU A DIWYLLIANT CYMRU  
AR LWYFAN Y BYD**

Amgaeaf gyfraniad byr ar ran y Cyngor Llyfrau yng nghyd-destun yr ymchwiliad uchod.

Byddem yn fodlon cyflwyno'r sylwadau yn llafar petai'r Pwyllgor yn dymuno hynny. Ond nid ydym yn pwysu am hynny: byddem yn hapus i'r papur gael ei gyflwyno i'r Pwyllgor ac i'r cynnwys gael ei adlewyrchu yn adroddiad y Pwyllgor.

Yn gywir,

GWERFYL PIERCE JONES  
Cyfarwyddwr



## Ymateb i Gais am Dystiolaeth:

### Ymchwiliad y Pwyllgor i Hyrwyddo Celfyddydau a Diwylliant Cymru ar Lwyfan y Byd

Mae sector cyhoeddi llewyrchus a bywiog yn hanfodol bwysig ar gyfer lledaenu gwybodaeth am Gymru a'i diwylliant trwy'r byd. Mae llyfrau'n cynnig mynediad hawdd i'r diwylliant hwnnw: llyfrau sy'n sicrhau bod Cymru'n weladwy ar lwyfan rhyngwladol. Asgwrn cefn pob llenyddiaeth iach yw'r diwydiant cyhoeddi. Oherwydd hynny, mae cefnogaeth Cyngor Llyfrau Cymru i gyhoeddi a dosbarthu teitlau o bob math – o nofelau llenyddol i lyfrau am y celfyddydau gweledol – yn gyfraniad allweddol tuag at hybu diwylliant Cymru ar raddfa fyd-eang.

Mae Cyngor Llyfrau Cymru'n cydweithio'n agos gyda chyfranwyr diwylliannol a llenyddol eraill, gan gynnwys Cyfnewidfa Llen Cymru, Yr Academi Gymreig/Cyngor Celfyddydau Cymru, y Cyngor Prydeinig, Amgueddfa Genedlaethol Cymru a Llyfrgell Genedlaethol Cymru, yn ogystal ag amrywiaeth eang o fannau gwerthu ac arddangos megis orielau a siopau llyfrau, er sicrhau bod digwyddiadau ac arddangosfeydd llenyddol a chelfyddydol yn derbyn cefnogaeth gan y fasnach lyfrau.

Mae'r diwydiant cyhoeddi – sy'n cynnwys cynhyrchu, hyrwyddo, dosbarthu a gwerthu llyfrau – yn fan cyfarfod unigryw rhwng diwylliant, busnes a thwristiaeth yng Nghymru ac yn fyd-eang. Mae teithiau masnachol a ffeiriau llyfrau rhyngwladol, megis Ffair Lyfrau Frankfurt, yn cynnig cyfleoedd dihafal ar gyfer atgyfnerthu'r sector cyhoeddi yng Nghymru a thrwy hynny ennyn diddordeb mewn gwledydd eraill yn ein celfyddydau a'n diwylliant. Bu presenoldeb Cymru yn Ffair Lyfrau Frankfurt, gwerthu llyfrau trwy siop ar-lein gwales.com a chynnal Swyddog Tramor Cyngor Llyfrau Cymru, yn ddolenni pwysig yn y gadwyn hon.

Ar hyn o bryd, oherwydd prinder arian, ni fu modd i'r Cyngor Llyfrau ail-lenwi swydd y Swyddog Tramor. Hefyd, yn sgil newidiadau yn y drefn ariannu Ewropeaidd, yr oedd peth ansicrwydd y llynedd ynglŷn â chefnogaeth Busnes Cymru Rhyngwladol (IBW), sy'n ariannu'r gynrychiolaeth Gymreig yn Ffair Lyfrau Frankfurt. Yn y pen draw, llwyddwyd i bennu cyllideb ar gyfer mynychu'r Ffair, er ar raddfa lai nag o'r blaen, ond mae'r sefyllfa'n aneglur unwaith eto ar gyfer 2009.

Byddai diogelu gwaith hyrwyddo ein diwydiant cyhoeddi yn Ffair Lyfrau Frankfurt, ehangu ei bresenoldeb mewn ffeiriau rhyngwladol eraill a datblygu rôl y Swyddog Tramor yn hwb aruthrol i'r sector yn gyffredinol. Byddai hefyd yn mynd â'n diwylliant a'n celfyddydau i sylw'r byd. Mae cydweithio agos rhwng amryw o adrannau Llywodraeth Cynulliad Cymru yn anhepgor ar gyfer datblygu gwaith rhyngwladol Cyngor Llyfrau Cymru.

Ionawr 2009